

吉石齋叢書三集

黃山圖舊本四張上載三十六峯中下

飛龍峯下有新興寺又下有龍吟石

石門峯狼豹洞又左之下萬石市

雲門峯下有焦村

翠微寺下有廣寺

翠微洞下有五福堂

藍若寺

仙都峯下有福寺

望仙峯下有薌林寺

九龍洞 藏雲洞

芙蓉峯下有花山寺

朱砂石有湯池 符祥亦在下

浮邱祠之下有黃濟祠 有折足橋

舊本黃山小景祥符祠刊

黃山圖經

宋無名氏著

黃山舊名黟山當宣歙二郡界在歙之西北高一千一百七十丈東南屬歙縣西南屬休寧縣各一百二十里即軒轅黃帝棲真之地唐天寶六年六月十七日勅改為黃山按江南諸山之大者有天目天台二山郡國志云天目山高一萬八千丈而低

于黃山者何也天目近連浙江天台俯瞰
滄海地勢傾下百川所歸而宣歙二州即
江之上游海之濫觴也今計宣歙之平地
已與二山齊焉況此山有摩天戛日之高
則浙東西宣歙池饒江信等郡之山竝是
此山肢脉諸峯積石迥如削成煙嵐無際
雷雨在下霞城洞室乳竇瀑布無峯不有
巖巒之上奇蹤異狀不可摸寫誠神仙之

窟宅也山上往往聞峯上仙樂之聲自郡
至山口一百二十里自山口至湯院又八
里磴道崎嶇頗通車馬按周書異記神仙
傳云黃軒轅黃帝問道于廣成子受胎息
于容成子吐納而谷神不死獲靈丹于浮
丘翁遂思超溟渤遊蓬萊乃告浮丘公曰
願振衣躬侍脩煉浮丘公曰擇賢而師學
必精奧棲隱勝地業則易成煉金為丹必

假于山水山秀水正其藥乃靈江南黥山
據得其中雲凝碧漢氣冠羣山神仙止焉
地無葷辛境絕腥腐古本靈藥三冬不凋
名花異果四季皆有山高木茂可為炭以
成藥迸泉直瀉狀如飛布下有靈泉香美
清溫冬夏無變若能齋心潔已沐浴其中
飲之灌腸萬病皆愈矣黃帝遂命駕輿容
成子浮丘公同游此山山有三十六峯三

十六源二十四溪十二洞八巖

第一煉丹峯浮丘公于此山頂上煉丹經
八甲子丹成黃帝即服七粒不籍雲霧昇
空遊戲故其上有煉丹竈下有煉丹源源
中有煉丹水下有洗藥溪搗藥石曰儼然
常存

第二天都峯高九百仞與煉丹峯相並如
天中羣仙之所都峯下有香谷源長聞異

香馥郁又有香泉溪泉水中嘗香美也

第三青鸞峯如青鸞之蹲顧連天都峯高
八百二十仞下有採藥源黃帝曾于此處
採藥也

第四紫石峯純是紫石連青鸞峯高六百
仞下有湯泉溪歙州圖經云黟山東峯下
香泉溪中有湯泉二口如椀大出于石澗
熱可煮石仙經云山石出硫磺朱砂其水

即熟此殆朱砂乎春時即紅氣味香美周
書異記云黃帝受浮丘公還丹再服四十
二粒毛髮之類黧潤過常視其肌膚悉皆
皴折浮丘公命黃帝至湯泉浸七日皴折
故皮隨水而去斯須湯池中有黃龍現雲
霧翳空上有笙歌之聲逡巡霧氣開散青
天亮皎正當日晝香氣氤氲隨風襲人黃
帝浮丘公容成子同見一珠函一玉壺浮

丘公啟之函中有霞衣寶冠珠履壺中有瓊漿甘露浮丘公曰此是上天降下以奉

黃帝遂授于帝帝乃受之持歸石室

此下事具

望仙浮丘公遂于南峯題石壁記以示後

世尋至唐大歷中歙州刺史薛邕遣人就

立舍宇大設盆斛病無輕重入者皆愈又

至大中五年刺史李敬方患風疾遂至湯

池浸浴六年十一月又入浴因感白龍見

風疾遂瘥乃造白龍堂並勒銘以記其銘

曰

黔山南垠湯水沸騰伏陽韜焰陰火潛蒸
盛夏不增窮冬不冰其誰主張唯龍是膺
刺郡二年病不能興發汗五日信而有徵
乃作龍堂于湯西陵乃刻龍像作神依憑
非衆非公非巫非僧王徭步將陳顓歛丞
迭掌吾事各勤爾能未盡瞻依去懷憂兢

苟肆慢心貽神惡憎盲瞶瘡癰災爾相仍
壬申既夏一陰始昇鐫石室壁庶無騫崩
遂號湯院請僧住持焉保大二年元宗皇
帝勅為靈泉院宋朝賜名祥符

第五鉢孟峯覆鉢之狀連鍊丹峯高八百
五十仞下有新羅庵基址猶存神仙補闕
傳云昔劉宋時有一東國僧人不知姓名
于此修禪定學道術一生休絕三十餘年

不出溪口況山下乎于峯脚平石上以錫
杖卓出一泉鍊丹而服偶一日彩雲仙樂
來迎忽乘龍飄然上昇又有一洞深邃多
蛇蟲入不敢入其僧鍊丹之處梁大同中
有一樵叟入見一婦鼎石竈藤蘿纏鎖猶
在因名仙僧洞洞口陰暗之夜有一燈現
宛如星明人謂之聖燈又有擲鉢原其僧
常擲鉢于空中久而始下其錫杖泉至今

存焉

第六桃花峯連鉢孟峯高八百仞下有桃花源溪洞中純是桃花三月方盛開每謝之時滿溪水紅流入湯泉溪春即名桃花湯第七朱砂峯宛如削成高九百仞峯半壁有硃砂巖岩中有朱砂望之如欲崩顏猿猴亦不能到惟飛鳥方及神仙補闕傳云

浮丘公黃帝同取此朱砂煉丹故天下獨
貴人莫能獲下有朱砂洞朱砂巖朱砂溪
溪口水向東流入湯泉溪

第八獅子峯連朱砂峯西南高五百仞宛
如獅子蹲踞下有錦霞洞常有錦霞生又
有香林源林中常有異香馥郁

第九蓮花峯連朱砂峯北高九百仞如蓮
花正開下有蓮花洞蓮花源水流入朱砂

溪與桃花溪水合流

第十石人峯在蓮花峯北高七百仞宛如人形下有白鹿源曾有白鹿出為人所獵而貢之又有駕鶴洞浮丘公在此駕鶴也第十一雲際峯在石人峯西南高八百八十仞峯頂入雲際下有藏雲洞長藏白雲又有乳水源味如乳下有布下水落白雲溪溪中長生白雲水向東流入桃花溪